

17/10/2002

Interaksi pelajar berlainan bangsa kian renggang

Hasliza Hassan

DALAM ucapannya ketika melancarkan Universiti Tunku Abdul Rahman (Utar), Ogos lalu, Perdana Menteri mengumumkan kerajaan akan memberi hadiah sebagai galakan kepada kelab di semua universiti yang mencipta kaedah merapatkan hubungan dan menarik penyertaan pelajar dari semua kaum.

Datuk Seri Dr Mahathir Mohamad berpendapat, pelajar universiti kini dilihat bukan saja mengasingkan diri mengikut kaum dan tidak berkongsi bilik di asrama, malah duduk berasingan di dewan kuliah, padang permainan atau dalam kegiatan kokurikulum.

Keadaan ini berbahaya dan tidak sihat dalam sebuah negara pelbagai etnik kerana apabila keluar universiti untuk bekerja, mereka akan bertemu masyarakat pelbagai keturunan yang berbeza daripada masyarakat ketika menuntut di universiti.

Mengulas kebimbangan itu, tokoh akademik, Prof Datuk Dr Firdaus Abdullah, mengakui daripada pengamatannya interaksi di antara pelajar berlainan kaum semakin renggang.

Katanya, keadaan itu berbeza ketika beliau menjadi pensyarah kira-kira 30 tahun lalu, pelajar Melayu dan Cina boleh dilihat mengadakan 'study group' secara bersama dan spontan.

Beliau berkata, mereka bukan saja boleh berinteraksi untuk peningkatan akademik, malah dalam kegiatan sosial seperti bersukan dan pergi menonton wayang bersama-sama.

Bagaimanapun, katanya, dari setahun ke setahun hingga ke hari ini, interaksi sedemikian semakin berkurangan hinggan pada tahap yang tidak ada langsung.

"Jadi saya membenarkan pemerhatian yang dibuat oleh Perdana Menteri mengenai kerenggangan itu.

"Tetapi apa yang kita nampak, ia hanyalah kerenggangan, belum lagi bertembung menjadi suatu perkelahian atau tindakan ganas," katanya.

Dr Firdaus berkata, masalah perkauman disedari semua orang, cuma kesedaran itu tidak diterjemahkan kepada tindakan konkrit dalam usaha menyelesaikan masalah yang dihadapi.

Katanya, perkara yang ditimbulkan kembali Dr Mahathir hanya mengingatkan masyarakat kepada perkara yang disedari supaya dapat diterjemahkan pandangan dan nasihatnya itu kepada tindakan.

Beliau berkata, toleransi dan persefahaman adalah prasyarat untuk mewujudkan perpaduan dinamik dan produktif di kalangan masyarakat berbilang kaum di Malaysia.

Aktivis sosial, Tan Sri Lee Lam Thye, berkata rakyat perlu sedar dan menghargai pentingnya untuk mewujudkan keharmonian dan perpaduan di antara kaum yang berkekalan.

Katanya, institusi pembelajaran seperti tadika, sekolah rendah dan menengah serta pusat pengajian tinggi hendaklah mengambil langkah memastikan ada interaksi di antara pelajar dan menangani isu polarisasi kaum.

"Kanak-kanak yang dibesarkan dalam suatu persekitaran yang mana hanya wujud interaksi dengan satu kaum akan membesar tanpa berinteraksi dengan mereka yang berlainan kaum. Ini terbawa-bawa sehingga mereka dewasa," katanya.

Lee berkata, perpaduan tidak boleh dicapai melalui undang-undang kerana rakyat tidak boleh dipaksa untuk bersatu.

Sebaliknya, katanya, perpaduan harus disemai di lubuk hati setiap rakyat

atas prinsip sukarela dan kesadaran mereka tidak mempunyai pilihan kecuali untuk hidup dalam keamanan dan harmoni antara satu sama lain.